



KOPI PAHIT

Puan Siraj, mengikut *Her World*, majalah wanita berbahasa Inggeris, adalah salah orang-orang yang utama mengemukakan tertubuhnya Mahkamah Syariah di Singapura. Ini ialah pengakuan puan itu tatkala dijumpainya. Ia menyatakan juga di dalam temu ramahnya dengan majalah itu bahawa ia menggalakkkan semua negeri di Tanah Melayu menyamai pertadbiran mengawal perceraian supaya orang-orang tidak boleh menyeberangi Selat Tebrau dan mengadakan perceraian cara lama di lain negeri – sekian temu ramahnya. Adakah cara itu tidak bertentangan dengan dasar hukum Islam? Adakah perceraian yang diikat oleh Mahkamah Syariah di Singapura hukum itu mengikut hukum Barat? Dalam “undang-undang Islam” (1957) ada menyebut seorang suami tidak boleh mencerai isterinya melainkan dengan persetujuan isteri itu.

Adakah ini hukum yang tidak bertentangan dengan syarak? Orang sekarang mahu tahu!

* * *

Almarhum al-Shaykh Abdul Qadir Awdah seorang hakim Islam di Mesir pernah berkata: “Jika saya seorang hakim yang bukan Islam, saya akan mengagung-agungkan dan mendewa-dewakan undang-undang yang dibuat oleh orang Barat. Tetapi saya sebagai seorang hakim Islam, maka saya tidak mahu menerima undang-undang selain daripada undang-undang Allah!” Pada lain tempat pula almarhum itu mengatakan: “Jika seorang hakim Islam membuat undang-undang yang bertentangan dan selain daripada undang-undang Allah maka tidak syak lagi perbuatan itu kufur!” Dan seterusnya beliau membawa ayat-ayat Qur'an bagi mendirikan hujah-hujah beliau! Bagaimana fikiran “cerdik pandai” yang cuba menukar hukum Tuhan dengan hukum mengikut kemahuan nafsu dan cara orang Barat itu?

* * *

President Sukarno yang masih cinta sama China dan Komunis memerintahkan tentera Indonesia menembak

penunjuk-penunjuk perasaan yang membakar atau merosakkan harta benda. Sehari sesudah perintah itu di Semarang orang-orang Islam membakar dua buah kilang rokok dan menyerang penghuni-penghuninya orang-orang Cina. Tentera tidak menembak dan buat tidak tahu sahaja. Ini ertinya kuasa Sukarno sudah luntur dan tidak dihargakan lagi. Begitulah yang berkuasa akan jatuh dan akan menurun kerana tiap-tiap yang naik – apabila sampai batasnya akan menurun semula.

* * *

A. Abdul Hamid Khan, Menteri Hal Ehwal

Masyarakat Malaysia menyatakan bahawa 78 milion ringgit telah didapati daripada hasil Loteri Kebajikan Masyarakat. Wang-wang loteri itu sebahagiannya telah digunakan kerana membina masjid-masjid dan surau-surau serta membantu madrasah-madrasah. Dengan ini jelasnya bahawa bantuan Tun Abdul Razak menerusi luar bandar membuat masjid-masjid dan surau-surau itu adalah khas dari duit-duit loteri yang disebut oleh A. Abdul Hamid Khan! Hai! Begini rupanya. Orang-orang Islam sekarang tahu lah....?

* * *

Di antara orang-orang Islam yang hadir di dalam pertemuan ahli-ahli pertubuhan agama yang dianjurkan oleh Perdana Menteri Lee Kuan Yew didapati Konsul Agung kerajaan ‘Arabiyyah Sa‘udiyyah iaitu wakil kerajaan asing yang bukan rakyat Singapura atau Malaysia. Perkara yang dibicarakan perkara mengenai hal ehwal di negeri ini. Mengapa kerajaan asing diundang sama?

* * *

Perdana Menteri Singapura Tuan Lee Kuan Yew, telah membidas keadaan di Malaysia. Tengku Abdul Rahman membantah dan Tun Razak menghantar nota amaran supaya Lee jangan campur perkara Malaysia. Lee tidak berbunyi tetapi Menteri Kebudayaan menjawab dan menjelaskan persoalan bagi pihak Tuan Lee. Orang bertanya adakah ini menjadi dasar kalau Lee salah lidah – ia katup bibirnya dan orang lain tukang jawab? Pertanyaan serupa ini selalu kerana kejadian tidak pernah sesuatu dinafikan sendiri oleh yang berucap.

Cemeti al-Farouk